

08/01/2003

Mengapa Dr Hassan perlu kecewa pendirian NU?

Abdus-Salam Ben-Salam

PAS melatah lagi. Kali ini atas pendirian 180 darjah berbeza dua pertubuhan berasaskan Islam di Indonesia dengannya mengenai undang-undang Islam dan pembentukan negara Islam.

Naib Presiden Pas, Datuk Dr Hassan Ali, misalnya dilaporkan menyatakan kekecewaannya dengan pendirian pertubuhan itu - Nahdatul Ulama (NU) dan Muhammadiyah, yang menyarankan agar perjuangan untuk menegakkan undang-undang Islam dan negara Islam di negara republik itu harus dihentikan.

Pendirian itu kata Dr Hassan, tidak sensitif terhadap usaha yang dilakukan di negara lain yang cuba mewujudkan undang-undang syariah.

"Tidak ada keperluan untuk meneruskan perjuangan bagi mewujudkan undang-undang syariah. Kita patut mengambil inti pati daripada nilai Islam dan melaksanakannya di Indonesia, bukan simbolnya.

"Janganlah berusaha untuk mendapatkan kepentingan politik dengan mempolitikkan agama," kata Pengerusi Muhammadiyah, Ahmad Syafii Maarif seperti yang dilaporkan akhbar berbahasa Inggeris The Jakarta Post, 31 Disember lalu.

Pertubuhan Muhammadiyah dikatakan pertubuhan Islam kedua terbesar di Indonesia dengan kira-kira 30 juta ahli.

Ahmad Syafii juga dilaporkan berkata, betapa jika umat Islam terlalu menekankan soal formaliti seperti usaha menegakkan undang-undang syariah dan negara Islam, mereka bertembung pula dengan penganut agama lain yang akhirnya usaha mereka itu akan menemui kegagalan.

Sebelum itu, pada 29 Disember lalu, Pengerusi NU, Hasyim Muzadi yang membentangkan laporan penilaian akhir tahun pertubuhan yang mempunyai kira-kira 40 juta anggota itu dilaporkan berkata:

"Perjuangan untuk menegakkan undang-undang syariah di Indonesia adalah tidak realistik. Apa yang perlu kita perbaiki ialah nilai sejagat demi kemakmuran hidup rakyat."

Adalah difahamkan kenyataan pasif kedua-dua pertubuhan berasaskan Islam itu mengenai pelaksanaan undang-undang dan negara Islam adalah berikutan keadaan semasa yang berlaku di Indonesia.

Ia khususnya berikutan keganasan yang dikatakan dilakukan oleh umat Islam seperti pengeboman kelab malam di Kuta, Bali pada 12 Oktober lalu.

Pelik juga kenyataan Dr Hassan yang melahirkan kekecewaannya dengan pendirian pertubuhan berasaskan Islam itu yang kedua-duanya pula berpusat di negara asing.

Luahannya itu hanya menunjukkan beliau dan Pas tiada keyakinan diri untuk memperjuangkan undang-undang Islam dan negara Islam di negara ini tanpa hal yang sama di lakukan di negara luar seperti Indonesia.

Ini membuktikan lekehnya kepemimpinan Pas. Ia seolah-olah memerlukan kekuatan luar bagi memberikan kekuatannya di negara sendiri.

Apabila pertubuhan di luar sepertinya tidak mahu meneruskan perjuangan seperti yang Pas hendak perjuangkan di negara ini, parti itu kehilangan satu daripada punca kekuatannya.

Ini sama dengan keadaannya baru-baru ini apabila pemimpin Pas seperti melonjak kegembiraan dengan kemenangan parti AKP di Turki dengan beranggapan parti itu parti berasaskan Islam dengan perjuangannya sama sepertinya. Lalu membayangkan pula kemenangannya pada pilihan raya umum akan datang.

Namun didapati kemudian, AKP tetap dengan pendiriannya mengenai kepentingan negara sekular yang jauh panggang dari api dengan pendirian

Pas yang amat bencikan sekular!

Sepatutnya, apa juga yang hendak dilakukan pertubuhan seperti ini, mestilah berdasarkan keyakinan diri yang tinggi.

Kalau ia rasa perlu perjuangkan undang-undang Islam atau negara Islam, ia harus teruskannya tanpa perlu mengambil kira apa yang berlaku di luar negara.

Ini terbukti dengan kepemimpinan Umno di bawah Perdana Menteri, Datuk Seri Dr Mahathir Mohamad yang menunjukkan, berkali-kali betapa ia mempunyai acuannya dalam mentadbir negara.

Dr Hassan dan pemimpin seperti ini dalam Pas sepatutnya mengambil iktibar daripada apa yang dikatakan oleh ulama terkenal dari Makkah dan Madinah, Prof Dr As-Sayyid Muhammad Ibnu Alawi.

Betapa katanya: "Semua orang mengetahui tanah air dia. Orang Makkah, dia mengetahui soal tanggungjawabnya di tanah Makkah dan orang Malaysia, dia mengetahui apa kepentingan negara dia di Malaysia."

Beliau menjelaskan betapa hal ehwal negara, hanya boleh ditentukan oleh penduduk di negara masing-masing.

Pemimpin kedua-dua pertubuhan di Indonesia itu tentunya lebih mengetahui tentang keadaan di negaranya.

Dengan Pas beriya-ia hendak mengharap pertubuhan seperti ini di luar negara menumpukan perjuangan yang sama, kini parti itu sepatutnya bersama-sama dalam menanggalkan hasrat untuk memperjuangkan undang-undang Islam dan negara Islam.

ABDUS-SALAM BEN-SALAM,
Kuantan, Pahang.